

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 70, No. 1396

原始資料: CBETA 人工輸入, CBETA 掃瞄辨識

## No. 1396-A 天台無見覲禪師語錄序

宗門嫡派。祇論真贗。不論隱顯。真得正法眼。常作人天師者。雖埋踪劇影。而千載精光自然迸現。玉潤山輝。珠藏川媚。神物呵護。不可得而埋沒也。達磨西來。至曹溪祖而別為五。臨濟正傳。至無準範而別為二。斷橋倫與雪巖欽。其雙鷗竝擊。兩驥偕馳者也。後來一翔一集。一躍一潛。總在大機大用。不可思議中。擔當佛祖慧命。豈假聲施烜赫。與世法角門庭哉。無見覲和尚。為斷橋嫡骨嫡髓兒孫。而介菴進和尚。則無見之十三世墮地獅孫也。此錄自元丁酉。歷明迄今丁酉。恰三百年。而嚮來藏之名山。傳之其人者。忽從龍宮海藏推出。俾金明介和尚得拂拭而光大之。亦大奇特因緣矣。天台自智者大師。以至大寂高菴諸名宿。卓杖華頂。響振諸方。而無見和尚乃能於高寒孤僻之地。展一坐具。閱盡四十春秋。足跡不離戶限。而道價洋溢。奔走歸依。拈提開示。悉從一毛頭現寶王剎。微塵裏轉大法輪。稱性而談。機鋒聳峻。視世間語言文字逼塞虛空者。何啻千里萬里哉。紀實讚頌。具在金華黃晉卿學士序。國清曇噩大師塔銘。雙徑元叟端禪師跋中。足當千秋攷證也。順治丁酉季穉中澣日。國子司業前戊辰二甲進士。虞部郎副廷尉。曹溪弟子福徵[橘-矛+佳]李道一居士埽菴譚貞默槃談撰。

## No. 1396-B 無見覲禪師語錄序

天台之華頂峯有大比丘居焉。曰無見覲禪師。禪師之道。上承臨濟之正傳者也。蓋自菩提達磨以摩訶迦業所得無上正法。至于東土。直接上根。其後支分為二。而心印獨傳於曹溪。派別為五。而宗風大振於臨濟。其得人之眾。莫臨濟一宗為盛焉。七傳至於楊岐白雲五祖圓悟。誠所謂不立一法。根源直截。使人明心見性以成佛者矣。悟之傳有虎丘隆公大慧杲公。皆卓然樹立教道於故宋南渡之初。東南禪門之盛。遂冠絕於一時。而隆之傳為應菴華公密菴傑公破菴先公及無準範公。凡四世。範公之傳則有斷橋倫公雪岩欽公。當宋之季年。宗開耆宿相繼遷謝。而二公獨唱道東南。以振揚宗風為己任。可謂禪門之柱石矣。倫公之傳為方山寶公。而禪師則得法於寶公。故其門庭巖峻。機關警捷。無忝於乃祖。其居華頂四十寒暑。苦行堅守。足跡未嘗下山。不起于座。而道價之重。傾動遠邇。此其為道。豈非有光于臨濟之正傳者耶。初欽公之傳為高峯妙公中峯本公。而妙公晏坐天目山。設死關以待學者。終其身亦不下山。其與禪師實法門叔侄行。故其為道若出一揆。入 國朝以來。能使臨濟之法復大振於東南者。本公及禪師而已。可謂盛哉。禪師沒既久。弟子道昌集其語錄將刊梓以行。來請予為序。予於禪師之道。其微奧高遠者。誠非所能知。輒述其源流之所自。書于

首簡。庶使覽者目擊而道存。則思過半矣。至正十七年歲在丁酉二月甲子。中奉大夫前翰林侍講學士知制誥同修國史同知經筵事黃潛撰。

## No. 1396-C與譚祭酒書

無見和尚語錄。得其殘蠹之餘。輯為二卷梓行。俾閱者非徒追配古德。益見祖大。坐華頂四十年。足不越閩。而道風彌播。傾動寰宇。元主賜號終其山。于中應機垂示。開鑿眼目之奧旨。進不敢私。特揭出以公諸天下。煩居士送入楞嚴經坊。以便請看。幸甚。

## 無見和尚語錄目錄

序文(黃文獻公撰)

卷上示眾

小參

法語

頌古

真贊

卷下偈頌

山居詩

題跋

臨終遺誠

辭世偈

附塔銘(國清曇暉撰)

跋

## No. 1396

### 妙明真覺無見親和尚住華頂善興禪寺語錄卷上

處州福林禪院嗣法門人智度等編

嘉興金明寺第十三代孫悟進重梓

### 示眾

風泠泠。日杲杲。蒼蘆花開滿路香。池塘一夜生春草。堪悲堪咲老瞿曇。四十九年說不到。阿呵呵。拍禪床下座。

示眾。若論此事。三世諸佛。一大藏教。詮註不及。天下老和尚。拈提不起。直饒有傾湫之辨。倒嶽之機。一點也用不著。諸仁者。饑則喫飯。困則打眠。熱則乘涼。寒則向火。——天真。——明妙。何得躡步向前。論禪論道。誤將魚目為珠。錯認橘皮作火。不見道。大機須透徹。大用須直截。不識東家孔丘翁。却向他邦尋禮樂。

卓拄杖云。錯。復舉龐居士問馬大師。不與萬法為侶者是什麼人。馬祖云。待汝一口吸盡西江水。却向汝道。士有省。師頌云。一口吸盡西江水。鷓鴣啼在深花裏。縱饒直下便承當。何啻白雲千萬里。曳拄杖下座。

小參。臨濟入門便喝。德山入門便棒。亂世英雄。雪老低頭歸菴。麻谷携鋤入園。太平奸賊。所以道。句中不停意。意中不停句。意句不同倫。且作麼生會。直饒向劍刃上翻身。水稜上走馬。也是無風匝匝之波。不見雲門道。盡乾坤大地。無絲毫過患。猶是轉句。不見一法。始是半提。更須知有全提底。且作麼生是全提底。擊拂子云。自出洞來無敵手。得饒人處且饒人。復舉臨濟問德山示眾云。道得也三十棒。道不得也三十棒。濟令侍者去問。為什麼道得也三十棒。道不得也三十棒。他若打你。接住送一送。看他如何。侍者至彼理前問。德山便打。侍者接住送一送。德山便歸方丈。侍者回舉似臨濟。濟云。我從來疑著者漢。雖然如是。汝還見德山麼。侍者擬議。濟便打。師云。千鈞之弩。豈為鼯鼠發機。奔流度刃。疾燄過風。則不無二老。仔細檢點將來。三十棒只合自喫。何故。將頭不猛。累及三軍。擊拂子下座。

### 小參

過去諸如來。斯門已成就。夢裏求形。水中捉月。現在諸菩薩。今各入圓明。浦得老鼠。打破油甕。未來修學人。當依如是法。彼自無瘡。勿傷之也。無計較中翻成計較。無途轍中翻成途轍。殊不知。屠坊酒肆全彰古佛家風。鬧市紅塵顯出祖師巴鼻。若也舉一明三。目機銖兩。何啻白雲萬里。嘎。華開華落任風吹。自有清香滿天地。復舉雪峯示眾云。三世諸佛向火燄上轉大法輪。玄沙云。近日官令稍嚴。峯云。作麼生。沙云。不許攙行奪市。雪峰不覺吐舌。雲門云。火燄為三世諸佛說法。三世諸佛立地聽。師云。雪峰父子。將謂播揚大教。殊不知。馳騁機解。銜耀見聞。雲門忍俊不禁。道個火燄為三世諸佛說法。且道畢竟說什麼法。離婁明未徹。師曠聽非聰。便下座。

白雲度參問。西來密意未審如何。師云。待娑羅峰點頭即向汝道。度以手搖曳擬答。師便喝。度云。娑羅峰頂。白浪滔天。花開芒種後。葉落立秋前。師云。我家無殘羹剩飯也。度云。此非殘羹剩飯而何。師頷之。

### 法語

#### 示徐提點

信是道元功德母。長養一切諸善根。先聖曲垂方便。出一言半句。無非應病與藥。又何嘗以實法繫綴於人。迷則千差萬別。悟則事同一家。蓋因積劫以來。無明煩惱所覆。不能洞徹見源。豈可汨沒塵勞。虛喪光陰。一念稍有差別。墮在三惡道中。其時追悔嗟臍無及矣。古之有志於道者。巖居穴處。草衣木食。遇聲遇色。如石上栽花。見名見利。似眼中著屑。今人多為聰明利智所使。廣學多聞。以資談柄。如蠶作繭

自纏自縛。不能忘其筌蹄。誠可憐憫。呆菴提點。篤志此道。棄名利如弊屣。甘淡薄如頭陀。噫。天下無二道。聖人無二心。豈可自暴自棄。甘受輪轉。須是盡底放下世緣。頓忘人我。猛著精彩。密密參究。自然與道相應。李遵勗云。參禪須是鐵漢。著手心頭便判。直取無上菩提。一切是非莫管。

### 示蕭元帥

無上妙道。人人本具。蓋因積劫以來妄想執著。未能頓明本地風光。大力量人。當用真實工夫。舉古人話頭。於一切處。密密提撕。心心無間。驀然打破疑情。始有自由分。若是半疑半信。卒難搆得。正如關羽於百萬軍中取顏良首相似。不畏前境。決勝千里。豈不快哉。今時士大夫。沒溺文字語言。不下真實工夫。若欲洞徹生死根源。當如實而參。如實而悟。便可與佛祖把手共行。示現宰官身而為說法矣。

### 示蒯朝奉

我佛世尊。為一切眾生作大醫王。經云。我如良醫知病說藥。服與不服非醫咎也。一大藏教五千四十八卷。皆治世藥方也。將謂應病與藥。殊不知。藥多病甚。後代祖師。不能與之除去病源。却於灸癩瘡上。重加艾炷。或云。直指人心見性成佛。或云即心即佛。非心非佛。或擬議便喝。或開口便打。根性不等。用藥非一。消則成醍醐。不消成毒藥。病去藥存。是亦病也。玄沙示眾云。汝等盡道接物利生。忽遇三種病人作麼生接。患盲者。拈槌豎拂他又不見。患聾者。語言三昧他又不聞。患啞者。教他說又說不得。若接此三種人不得。佛法無靈驗。有僧請益雲門。門云汝禮拜著。僧拜起。門以拄杖拄。僧退後。汝不是患盲麼。門又喚僧近前。汝不是患聾麼。門云還會麼。僧云不會。門云汝不是患啞麼。其僧言下契悟。雲門大師慣用此藥。要且只能殺人不能活人。何故。上等醫人非藥為藥。中等醫人以藥為藥。下等醫人藥成非藥。且道。阿魏因甚麼無真。水銀因甚麼無假。甘草得恁麼甜。黃連得恁麼苦。若是具眼道流。不向舌根薦取。臚塘桂山先生素蘊儒業。又得盧扁之妙。常以濟物為懷。特承遠訪。扣問入道之要。直欲洞徹生死根源。因舉五祖演和尚云。釋迦彌勒猶是他奴。且道他是阿誰。但於二六時中。密密參究。久久純熟。驀然噴地一下。如病得汗。豈不快哉。

### 示直翁徐居士

長夏獲以同居岩間松下。一語一默喜不自勝。且道與古人夏中不聞正因兩字。是同是別。請直翁下一轉語。機先著眼。未是俊流。昔汾陽昭禪師參七十餘員善知識。後見首山問百丈卷席意旨如何。山云龍袖拂開全體現。汾陽又問師意如何。山云象王行處絕狐踪。汾陽於此大悟。禮拜起云。萬古碧潭空界月。再三撈摭始應知。傍有僧云。汝見甚麼道理。便乃自肯。汾陽云。正是我放身捨命處。看他古人終不肯自小結果。參禪縱有所省。若不見人。謂之癡禪。悟迹不除。翻成籠檻。一切處為之禁制。

坐在勝妙界中。前輩謂之鶻臭布衫。最難卸却。更宜審諦。第一不得向黑山下鬼窟裏作活計。第二不得向急水上打毬子。四威儀內。急切用工。驀然搗破面門。元來只是舊時人。更無絲毫為障為碍。言多道遠。勉之。

### 示覺空菴主

覺所覺空。空覺極圓。聞所聞盡。盡聞不住。恁麼見得。早涉途程。不見道。情存聖量。猶涉客塵。己見未忘。還同滲漏。豈可論心論性。講禪講道。以當宗乘。古之有志於道者。名利不干懷。財寶不為念。大忘人世。草衣木食。以實參實悟為期。若是口裏水漉漉地。惟增業識耳。檢點將來。成得甚麼邊事。聰明不敵生死。乾慧豈免輪迴。圓通菴主篤志於道。真末世光明幢也。但聰敏太過。坐在勝妙界中。見聞不脫。如水中月。一日需語為警策。吁。白雲山頂相見了也。圓通菴中相見了也。更有甚麼相孤負處。又欲拈秃筆塗白紙耶。

### 示玳禪人

昔日雪峰多苦行。不辭九到與三登。幡然有意思前古。一策春風下碧層。三山玳禪人同住峰頂。將欲遍參。出紙求語。古德云。識得拄杖子。一生參學事畢。且道。這個是拄杖子。那個是參學事。若也道得。未具參學眼在。若道不得。亦未具參學眼在。

### 示尼無瑕

昔大慧和尚會中。妙聰禪人。幼年打硬修行。曾在徑山度夏。一日大慧上堂。舉石頭示藥山。恁麼也不得。不恁麼也不得。恁麼不恁麼總不得。妙總於此有省。大慧舉岩頭打渡逢婆子話詰之。妙總頌云。一葉扁舟泛渺茫。呈橈舞棹別宮商。雲山海月俱拋却。贏得莊周蝶夢長。看他得底人。著著自有出身之路。豈肯死於語下乎。靖山禪士。孜孜為道。遠扣峰頂。袖紙乞語。況余藏拙深雲。初未曾與人道個不字。憫其情切。因書妙總見大慧因緣。果能如實而參到大安樂之地。雖百千妙總。亦在下風矣。就書一偈以勉。清標不讓末山尼。純淨無瑕亦未奇。噴地一聲真慶快。英雄真個丈夫兒。

### 示自省新戒

高菴和尚云。父母養汝身。師友成汝志。無饑寒之迫。無征役之勞。於此不精進成辦道業。他日何面目見父母師友乎。此語可與日月爭光。蓋出家非圖清閒取快活也。難行能行。難學能學。難忍能忍。難捨能捨。於一切處。舉古人話頭。密密參究。以悟為則。又不得將心待悟。四恩難報。信施難消。時光迅速。慎勿虛度。

### 示道昌禪人

古人正因出家。正因行脚。為生死不明。為斷煩惱。出三界。續佛慧命。非求安逸也。非求溫飽也。非求蝸角利名也。遠塵離俗。超越淤泥。山林岩穴。一心精進。

成辦道業。開善謙禪師示眾云。思量分別決定不是。見聞覺知決定不是。行住坐臥決定不是。問答語言決定不是。且絕此四個路頭。却提起趙州個無字。自然管取呵呵咲去。與夫浮辭濫說不伴矣。勉之。

### 示宗本新戒

古惠云。養子不須教。落賺自然會。其可教者。語言糟粕耳。治心須求妙悟。其妙悟之心。在乎勇猛精進。拶透向上關楔子。實不在語言文字也。縱有明師密授。不如心之自得。故曰得之於心。觸物遇緣。不謀而應。雖然。猶恐坐在勝妙界中。更須百尺竿頭進步得大自在可也。不得大愚辭歸宗欲往諸方學五味禪去。宗云。我者裏有一味禪。為甚不學。愚云如何是和尚一味禪。宗便打。愚云嘎。我會也。我會也。宗又打。看他古人門風高峻。手段惡辣。與夫婆婆和和者。何啻天淵之隔。且道。大愚畢竟會個甚麼。者裏道得也三十棒。道不得也三十棒。得汝異日歸來。肋下拔本。

### 示徒妙理參方

黃龍禪師云。父嚴則子敬。今日之規訓。後日之模範也。嫗之煦之。春夏所以生育也。霜之雪之。秋冬所以成熟也。吾欲無言可乎。出家當以戒行為先。戒是正順解脫之本。戒為入道之門。若無戒行。善根不生。佛祖明言。可不慎哉。但於一切處一切時。舉古人話頭。密密參究。驀然噴地一下。始有少分相應。庶不孤出家行脚之本志。因書偈以勉。教理精通驢繫檝。祖關透徹鳥棲蘆。二途不涉超諸見。方稱出家大丈夫。

### 示仁禪人

參禪學道。要在志之堅確。把做無緊得緊一件事。痛加煅煉。驀然萬仞崖頭撒手。放身捨命一番始得。若是顛顛預預。今日三明日四。虛喪光陰。大不濟事。不見玄沙云。我立地待汝搆取。如今不搆取。更待何時。毋得自輕而退屈。古德云。昨夜文殊普賢起佛見法見。各與三十拄杖。貶向二鐵圍山。噫。切忌認驢鞍橋。作阿爺下頷。

### 示顯禪人

古云。道本無言。因言顯道。又云。語不離窠臼。焉能出蓋纏。大丈夫如倚天長劍。凜乎不可干犯。始有自由分。祖師方便。如大火聚。近之則喪身失命。若是思而解。慮而知。則千里萬里矣。蒲田顯禪人欲瞻禮補陀。出紙求語。吁。同堂喫飯。同牀打睡。問訊起居。俯仰折旋。一一天真。有甚麼相孤負處。因書四句以勉之。頭頭物物顯真常。即是圓通徧十方。四萬八千峰頂上。寒梅樹樹噴清香。

是身壽命。如駒過隙。奚暇閒情。妄為雜事。果於二六時中。鬧裏底靜中明。靜裏底鬧中薦。驀然噴地一下。則參學事畢矣。

## 頌古

### 世尊拈花

禾黍不陽艷。競栽桃李春。翻令力耕者。半作賣花人。

### 那吒太子

廓清五蘊吞十方。平分風月已乖張。陽春雪曲知音少。打瓦鑽龜謾度量。

### 達磨門人各言所得

甜瓜生苦瓠。美棗多荊棘。利旁固有刀。貪人還自賊。

### 六祖風幡

不是風幡不是心。紫荊樹上結林檎。高山流水尋常事。不是子期誰賞音。

### 百丈野狐

不落不昧強名模。那個男兒是丈夫。夜靜虛堂人寂寂。一輪明月照平湖。

### 南泉斬猫

狸奴提起太生癡。擬議停機隨見坑。最好一刀分兩段。免教千古競頭爭。  
頭戴草鞋便出去。趙州何事太匆匆。沾衣欲濕杏花雨。吹面不寒楊柳風。

### 不是心不是佛不是物

頂門豎亞摩醯眼。肘後斜懸奪命符。堪咲東村王大姐。却來壁上畫葫蘆。

### 陸亘大夫問南泉天地與我同根

天地同根物同體。尋言逐句太模糊。牡丹花發如春夢。會得依然在半途。

### 庭前栢樹子

謾將庭栢示來僧。見得分明未十成。偏愛暮雲歸未合。遠山無限碧層層。

### 僧問投子。和尚住此山有何境界。子云丫角女子白頭絲

丫角女子白頭絲。四海禪流知不知。一旦風雷化龍去。刻舟求劍太愚癡。

### 趙州狗子佛性

狗子佛性。秉劍行令。擬議停機。喪身失命。

### 瀋山與仰山摘茶

子形不見只聞聲。體用全彰撼樹鳴。黃鶯枝上千般語。不是謳歌不是經。

### 趙州青州布衫

無絃琴別曲。穴鼻針穿線。西風一陣來。落葉兩三片。

### 僧問法眼如何是曹源一滴水。眼云是曹源一滴水。韶國師於言下大悟

曹源一滴混涇清。打碎焦磚連底冰。鸚鵡故鄉歸不得。大都言語太分明。

## 僧問首山如何是佛

新婦騎驢阿家牽。太虛空中生閃電。箴篋無柄擁春風。撼動落花飛片片。

## 五祖示眾釋迦彌勒猶是他奴。且道他是阿誰。便下座

雨洗淡紅桃萼嫩。風吹淺碧柳絲輕。縱饒曠劫生前會。也是空花醫眼睛。

## 俱胝豎指

一生受用不盡底。單單嚇得小孩兒。金華峰頂團團月。仔細看來似舊時。

## 僧問首山。學人到寶山空手回時如何。山云家家門前火把子

家家門前火把子。也是盲人撞瞎虎。畫棟朝飛南浦雲。朱簾暮捲西山雨。

## 德山托鉢

紅蓼汀洲一笛風。暮雲滅盡水吞空。可憐無限深秋意。祇在沙鷗冷眼中。

## 黃龍三關

我手何似佛手。人前剛要揚家醜。雨打梨花蛺蝶飛。風吹柳絮毛毬走。

我脚何似驢脚。瘡病不假驢駝藥。堪咲靈山老古錐。無端拋下個木杓。

人人有個生緣。三個猢猻夜簸錢。風送水聲來枕畔。月移松影到床前。

## 僧問石頭徹禪師。如何是教外別傳一句。徹云東村王老夜燒錢

東村王老夜燒錢。脫殼烏龜飛上天。盡道草生芒種後。誰知葉落立秋前。

## 犀牛扇子

國師無故索犀牛。侍者連忙呈破扇。聾人不聽天上雷。却向雲中看閃電。

## 良遂參麻谷

上門上戶苦辛參。携鑊入園亦未甘。十二本經幾賺却。誰知又被谷師瞞。

## 石頭馳書

寧可永劫受沈淪。不從諸聖求解脫。南嶽峰頭太險生。上天下地一隻鶴。

## 女子出定

青山不動勢崔嵬。百鳥逢春晝夜啼。公子不知時節換。玉鞭揚起過山西。

## 馬祖踏倒水潦

一脚踏倒太無情。秋月寒潭徹底清。試問慣諳途路者。長安去此幾多程。

## 青原參六祖

聖諦不為何階級。風吹不入雨不濕。縱饒脫體便承當。也是餬餅裏覓汁。

## 長慶問靈雲如何是佛法大意。答云驢事未了馬事到來

驢事未了馬事來。喜得陽春大地回。唯有嶺梅先漏泄。一枝獨向雪中開。



## 僧問石霜如何是和尚深深處。霜云無鬢鎖子兩頭搖

無鬢鎖子兩頭搖。六月雲深雪未消。萬仞峰頭獨足立。不妨提起活人刀。

## 馬祖問野鴨

飄然野鴨過長空。逐浪隨波不見蹤。忽爾鼻頭知痛癢。大雄峰頂喪家風。

## 臨濟囑三聖

瞎驢滅却正法眼。當頭切忌錯商量。天荒地老無人會。優鉢羅華遍界香。

## 百丈再參

振威一喝。虛空釘橛。三日耳聾。弄巧成拙。

## 僧問百丈如何是奇特事

獨坐大雄峰。烟雲千萬重。鳥啼花自咲。何處不春風。

## 趙州訪二菴主

柳色拖藍重。桃花爛熳紅。遊人看不足。分付與東風。

## 真贊

## 出山相

六年苦行。一麻一麥。餓得面皮黃。凍得眼睛白。夜半覩明星。無端揚醜惡。累及後代兒孫。個個無繩自縛。鬢頭跣足出山來。一任天下人貶剝。

## 觀音大士

寶月光中。慈悲相好。白水粼粼。綠楊裊裊。普與眾生除熱惱。無煩惱處討煩惱。

## 善財

百城烟水無知識。辛苦參尋去復來。是處春山春水綠。不勞彈指閣門開。

## 達磨祖師

直指人心。見性成佛。誑諄閭閻。未有了日。一華五葉成狼籍。

折蘆渡江。平地荊棘。心不負人。面無慚色。

## 寒山

心似秋月。話作兩橛。石壁題詩。弄巧成拙。

## 拾得

捱墨作戲。無可不可。閻丘老人。當面錯過。

## 三教圖

視不見我。瞻之在前。法身無為。不墮諸數。會得三家村裏事。隨機權變開門戶。陳年葛藤齊剝却。杲杲日輪正卓午。

## 馬大師

即心即佛。揚聲止響。非心非佛。露柱抽骨。出八十餘員知識。個個口裏水漉漉。誰云踏殺天下人。六六元來三十六。

## 韶國師

心外無法。滿目青山。冬瓜直儻侗。瓠子曲灣灣。枯曹源一滴之水。破清涼惟識之關。隨機應用顯綱宗。承言滯句管窺斑。四萬八千峯頂上。一輪秋月對慈顏。

## 無準和尚

者個[仁-二+董]儂。果難名模。非但藟苴。且是惡辣。誰知正法眼藏。向這瞎驢滅却。落賺後代兒孫。敲打虛空鳴曝曝。咄。

## 斷橋和尚

南山白額虎。踞地大哮吼。虛空弄爪牙。佛祖皆罔措。陳年莧菜根。毒氣多遍布。破家散宅者。競搥塗毒鼓。松山風撼碧濤寒。眼裏聞聲為舉似。

## 自讚

### 窄菴首座請

鬢頭破衲。百醜千拙。種荳不生苗。栽蔬根倒茁。勿逢穿耳客。機先還漏泄。眉間掛劍時。對面成途轍。窄則遍寥沉。寬則不容針。寒山撫掌咲呵呵。老倒豐干太饒舌。

### 錦江模畫記請

真形無形。真相無相。不依本分。打模畫樣。捩轉鐵面皮。虛空敲作響。看你這般伎倆。宜乎貶向錦江之上。

### 無文綺藏主請

一樹青松。一輪明月。佛法下衰。出這妖孽。妄言綺語。話作兩橛。鬢頭破衲坐磐陀。誰知弄巧翻成拙。明眼人前咲不徹。

### 昌禪人請

覷面相呈。更無回互。振威一喝。千聖罔措。青山滿目無今古。

### 海會寺印空長老請

萬峯頂走馬。大海中鞞毬。面目如親薦。鐵船水上浮。

### 壽寮元請

鬢頭破衲一村僧。火種刀耕住碧層。年老成魔無足恠。呵風罵雨得人憎。

### 范居士請

描也描不成。畫也畫不就。拈起黑漆竹篋。直得移星換斗。堪悲堪咲老維摩。一點酬人太多口。

### 有道潘學士請

以我為隱乎。吾無隱乎爾。面目太分明。認著還不是。阿呵呵。囉囉哩。柳栗橫肩不顧人。月明又渡坦溪水。

### 心海湧首座請

長松樹下。坐磐陀石。這般伎倆。對面不識。當陽一喝。太虛霹靂。波翻浪涌未為奇。生鐵蒺藜當面擲。

### 遠禪人請

耳朵兩片皮。鼻孔向下垂。一一皆明妙。覷面莫遲疑。長松樹頂月光輝。

### 自省新戒請

父子不傳之妙。豈可打模畫樣。若是跨竈兒孫。終不如盲摸象。不見臨濟參黃蘗。臨機進前劈口掌。者裏酌然能猛省。鼻孔元來搭唇上。

### 道源新戒請

形直影端。源深流長。描摹逼真。也只尋常。若是克家種草。當陽掀倒禪床。本來面目無遮覆。颯颯松風為舉揚。

### 朴侍者請

身從無相中受生。猶如幻出諸形像。大朴未分。形名未兆。早是起模畫樣。又豈可夢裏求形。水中捉月耶。咄。

### 顯禪人請

通身無影像。徧界絕行蹤。面目如親薦。長松撼碧空。

妙明真覺無見親和尚住華頂善興禪寺語錄卷上

## 妙明真覺無見親和尚住華頂善興禪寺語錄卷下

處州福林禪院嗣瀟門人智度等編

嘉興金明寺第十三代孫悟進重梓

### 偈頌

#### 示坦禪人

大道坦然。不可依倚。大道虛曠。寧存規矩。休執文字。勿滯妙理。水月非喻。鏡像莫比。寂靜忘心。坐鬼窟裏。向外馳求。白雲萬里。參玄上士。興決烈志。坐臥經行。密提祖意。心心無間。念念不異。異見狐疑。自暴自棄。打破漆桶。有何諱忌。截普賢脛。斷文殊臂。得大安樂。自在游戲。慎勿掠虛。欺誑巧偽。一翳在眼。空花亂墜。止止不須說。妙法難思議。溪邊白鷺鷥。飛上長松樹。

#### 示文禪人

秋露滴禪衣。秋風翻木葉。拈起鐵蒺藜。舉步自超越。為言西峯來。披雲扣岩穴。問訊了喫茶。一一皆明徹。胡為更覓語。對面成途轍。幽鳥隔窻啼。長松掛新月。

#### 示永嘉圓首座

覺海性澄圓。慎勿從他覓。烟水百城南。遍參善知識。相別已十年。尋訪千岑碧。凜凜冰雪中。坐對松根石。一喝分賓主。青天轟霹靂。應咲老瞿曇。彈指超彌勒。

#### 呈方山和尚

佛出現於世。為一大事故。開示正知見。利鈍悉皆度。偉哉天人師。參徒蟻羶慕。不涉思惟中。白雲千萬里。曲開方便門。示我轉身句。明朝雨脚收。卷衲便歸去。瓦鉢煮黃精。地爐煨紫芋。

#### 示山禪人

與汝拄杖子。虛空裏釘橛。奪却拄杖子。大海中捉月。提起殺活劍。弄巧翻成拙。寒山與拾得。撫掌咲不輟。奇哉妙蓮花。出水常清潔。胡為乃不然。行汗空言說。邪師過謬多。滔滔說甄別。縱饒玄會得。猶是眼中屑。不經大爐鞴。焉能抽釘楔。沃洲山上人。遠來扣岩穴。有大丈夫志。作事頗決烈。單方巴豆子。盡底為傾泄。通身冷汗流。再甦方奇絕。應病故與藥。不盡閒施設。僑梵波提側耳聽。舜若多神驚吐舌。

#### 示贊禪人

雪老低頭歸菴。麻谷携鋤入園。一對無孔鐵鎚。剛要掘地覓天。縱饒機先著眼。已隔三千大千。若還句下承當。如蠶作繭自纏。猛虎不食鷓鴣。俊鷹不打死鷗。一天真明妙。千聖亦莫能傳。驀然如桶脫底。始信吾不虛言。風送水聲來枕畔。日移松影到簷前。

## 示可西堂

居山二十年。自得山中趣。山鳥白晝啼。山花開滿路。木屐印蒼苔。蘿龕鎖寒霧。鐵錫與銅瓶。長年掛枯樹。山高分外寒。紙衣鋪艾絮。携籃挑笋芽。開畚種紫芋。上人如不忘。伴我峯頭住。

## 示興禪人

無端一念警然興。好似浮雲點太清。萬疊台山親到頂。桃花爛熳雨初晴。

## 示顯殿主

蜂房蟻穴光明藏。綠水青山正覺場。叉手進前休擬議。頭頭物物顯真常。

## 成知客之淨慈

不逼生蠶繭不成。丈夫立志要堅貞。南屏山裏參尊宿。慧日煌煌照世明。

## 示友維那

我儂忍饑尚不暇。奚暇為汝說佛法。萬峯頂上雨初晴。松杉翠滴蒼苔滑。

## 答劉知州

目擊道存真慶快。心如水月照何窮。蒙頭跣足寒山子。珍重閭丘慎覓蹤。

## 與克密釋兒宣差

宿雨初收暑氣清。御烟新染葛衣輕。大千沙界同文軌。鐘產賢良輔 聖明。

## 贈南明趙青山學士

春深相與登華頂。扣問葛洪舊丹井。六合茫茫人未知。月瀉千峯萬峯影。

## 示瓊禪人

生平自咲百無能。破衲蒙頭住碧層。壁角落頭生掃帚。弗曾拈起當烏藤。

## 示海禪人

寶陀岩畔海濤濶。滑石橋邊差路多。聞說爭如親見好。一聲幽鳥出烟蘿。

## 示日本揀禪人

未跨船舷三十棒。現成句子切須參。華峯四萬八千丈。流水松風為指南。

## 示玄禪人

冰河發燄非為妙。枯木生華亦未奇。對坐松根無別語。擡眸祇看白雲飛。

## 贈劉星士

白雲紅葉擁柴門。且捲星書坐石根。禍福盡從心召得。無心禍福不須論。

## 示安禪人

好個安心法。當陽妙不傳。誰知潭底月。元在屋頭天。

## 示何大夫鑄鐘

大冶爐中煨出來。頑銅鈍鐵總良材。清聲遠播三千界。擾擾勞生眼豁開。

## 送西臺常御史

腰佩黃金已退藏。苦心剋志扣諸方。華峯頂上曾親到。雲自閒閒水自忙。

## 答東嶼和尚

三世如來一口吞。陳言冷語不須論。三錢買個黃砂鉢。埋向爐邊煑菜根。

## 答濶濶出院使

異寵恩光下日邊。方袍新染 御爐烟。雲中老衲將何報。一炷清香禮佛前。

## 示常禪人

平常心是道。舉步入荒草。要知端的意。一老一不老。

## 禮方山和尚塔

雲巒暫下禮慈容。誨語如同一日中。佇立塔前泥半掩。湖光黯黯雨濛濛。

## 韶國師受業

心外無法揚家醜。滿目青山途路長。四百餘年行道地。遶簷栢子散清香。

## 法身頌

急水灘頭鳥作窠。槃陀石上種油麻。虛空[跳-兆+孛]跳須彌舞。鐵樹風前自放華

。

## 新成東淨

淨頭新搆欲如何。努力須還者一扃。若是等閒蹲坐去。空添臭氣上身多。

## 窄菴

藕絲竅裏乾坤潤。芥納須彌世界寬。有指有拳機用別。柴門常掩白雲間。

## 懶牛

不是無心耕石田。鼻繩掣斷已多年。橫眠三界乾坤窄。堪咲梁山寫不全。

## 懶菴

日上三竿猶未起。人來也弗豎拳頭。銜花百鳥無消息。一曲松風瀉碧流。

## 無文

素甘質朴欲何為。草座麻衣合自宜。胸次不留元字脚。一拳打碎五須彌。

## 信菴

驀然桶底脫。決定更無疑。獨坐茅簷下。拳頭接上機。

## 月潭

一輪常皎潔。冷浸碧波心。無物能堪比。清光照古今。

## 四威儀

山中行。紅荊花開錦一棚。幽鳥鳴。試問禪流作麼生。  
山中住。獨扇柴門亦懶拄。雙老鳥。每日飛來又飛去。  
山中坐。松根塊石莓苔裏。舉頭看。應咲白雲閒似我。  
山中臥。藁薦年深都抖破。寒夜長。煨取柴頭三兩個。

## 十二時歌

平旦寅。究明祖意莫因循。著衣喫飯尋常事。大死一回方始親。日出卯。世智聰明誇善巧。煮沙安得會成糜。晝餅從來不能飽。食時辰。取相修行徒苦辛。洗面忽然摸著鼻。元來只是舊時人。禺中巳。碧眼胡僧猶罔措。秘魔手裏擎木叉。道吾座上執笏舞。

日南午。大地撮來無寸土。無毛鷄子潑天飛。焦尾大蟲吞却虎。日昃未。剖露西來第一義。文殊不是七佛師。釋迦豈受燃燈記。晡時申。見得分明亦未親。若也從門而得入。須知不是自家珍。日入酉。對人懶得開臭口。老鼠成羣偷芋栗。床頭打翻破瓦缶。

黃昏戌。又見月從峯頂出。石上松根獨自行。風咲露滴麻衣濕。人定亥。山蠻杜[仁-二+(幺\*刀)]全不改。一拳打碎五須彌。信脚踏翻四大海。夜半子。不惜為君重舉似。趙州使得十二時。却被十二時辰使。鷄鳴丑。茅簷不掃青苔厚。紛紛黃葉墜岩前。片片白雲生谷口。

## 言語機關句

我有一言。千聖不傳。阿難合掌。迦葉擎拳。  
我有一語。切忌錯舉。昨日好風。今日好雨。  
我有一機。分明示伊。若也不會。鋸解秤鎚。  
我有一關。會也大難。風號萬壑。雪覆千山。  
我有一句。非思非慮。瓦銚煎茶。地爐煨芋。

## 山居詩

一樹青松一抹烟。一輪明月一泓泉。丹青若寫歸圖畫。添個頭陀坐石邊。  
莊生有意能齊物。我也無心與物齊。獨坐蒲團春月暖。一聲幽鳥隔窻啼。  
鴈聲歷歷冷雲邊。補得裙成袴又穿。紅日西斜松影轉。蒲鞋移晒屋簷前。  
山寮也作裝寒計。牕紙重糊分外牢。乾燥竹柴成把縛。夜深逐個取來燒。  
三間箬屋青松下。四壁重泥好置身。經又不看禪不坐。瓦爐終日自生塵。  
偶桃野菜過坑西。嫩草齊腰路欲迷。春雨弄晴春日淡。杜鵑啼住竹雞啼。

山房寂寂坐深夜。一點寒燈半結花。老鼠成羣偷芋栗。床頭打倒破砂鍋。  
白雲常鎖千峯頂。立處高兮住處孤。掘地倦來眠一覺。鋤頭當枕勝珊瑚。  
蟄處雲深活計疎。從他得失與榮枯。開畬墾地閒消遣。佛法身心半點無。  
蘿蔔收來爛熟蒸。晒乾香軟勝黃精。二時塞却饑瘡了。誰管簷前雪霰聲。

### 和永明禪師韻

高束瓶盂住翠微。從教世慙自隆夷。深明吾祖單傳旨。閒擬寒山出格詩。啼渴野  
猿窺澗水。聚羣林鳥折霜枝。賞音百舌陽春調。千載悠悠一子期。

機智無勢較淺深。青山有路可追尋。聽教兩鬢莖莖白。消盡平生種種心。今古桑  
田多變易。朝昏烏兔自昇沉。齋餘洗鉢歸來久。飽飯安眠不解襟。

到家舊路須忘却。未到家時路覺遙。每見落花隨逝水。咲看枯木上凌霄。千尋學  
海空奇浪。一片心田長異苗。構得茅菴可容膝。虛窻不礙四山朝。

卓錫無地可言窮。年老幽棲心轉慵。情識頓忘齊槁木。色香不壞貴遊蜂。千山草  
木歸春綠。一幅丹青古意濃。檢點庵前舊行路。銜花麋鹿久無蹤。

林泉寂寞難招伴。世路縈紆必假媒。捉月騎鯨狂未息。凌雲跨鶴志須摧。慧光自  
我性天朗。花種從人心地開。雙足跣趺香草軟。此身知是幾生來。

陰極陽生陽復陰。萬機不昧去來今。雜花遍界眾生念。霽月澄潭諸佛心。送臘寒  
梅香吐玉。迎春晴柳影搖金。了無淨穢分方所。禽鳥時時演妙音。

法法圓融妙莫論。無餘無欠眾中尊。雨滋白石生雲母。露引青苔上華門。爛煮木  
芽清有味。頻燒栢子澹無言。相逢禪客祇禪指。古佛家風喜復存。

爛堆黃葉買山居。無德於人且自於。可喜身為林下客。從教塵積案頭書。死生二  
事歸呼吸。真妄雙緣已斷除。當日遠公修白業。區區結社在匡廬。

片懷澹泞白雲鄉。堪咲勞生日日忙。海島定無延壽藥。仙家空有化金方。中天星  
斗明寒水。極目烟雲暗八荒。寂寂柴床孤定起。一聲清磬覺天長。

松蘿為蓋屋頭青。慣下生臺鳥不驚。雲片自開還自合。客情無送亦無迎。春回大  
地羣芳嫩。水漲前溪兩岸平。割愛毀形今已矣。是誰來涉世間情。

袈裟不展任灰塵。三十年來罷問津。天外難窮千里思。雲中自老一生身。羣峯雨  
後重添翠。幽谷華開晚見春。寄語東村王大老。今年貧勝去年貧。

晨鍾殷殷出林巒。又起人間事萬端。今日住來山水窟。昔年曾向畫圖看。青松萬  
本花無數。紅日三竿露未乾。但得此心平似地。任他鹿馬路欺瞞。

誰將心識苦評論。今古茯苓松樹根。道絕修時方合道。恩無報處始知恩。長年褐  
布衣三事。靜夜青天月一痕。百億恒河沙數佛。不消一口渾崙吞。

同人訪我喜盈眉。夜坐沉沉月影微。不是半生消積習。那能一語便投機。燈挑餘  
燼紅英落。火撥浮灰白雪飛。誰肯深山話岑寂。明朝未可即言歸。



夜梵千聲月未央。不知消盡篆文香。斷槎東海靜中開。一枕南柯夢裏忙。自覺娑婆光影短。憶歸清泰念頭長。寶幢珠網重重護。種種莊嚴不可量。

三合聊資六尺軀。過天名利任他圖。自從念斷諸緣息。誰管山平萬象枯。水鳥引雛沿澗走。樵童尋伴隔林呼。有心固必夷齊輩。千古首陽成餓夫。

清冷雲中到者稀。廓然物我自同歸。桃紅李白資真諦。燕語鶯啼闡妙機。新水漲溪魚影密。宿雲歸洞日光微。祇將一默酬知己。是不是兮非不非。

世路從茲不轉頭。鬢鬆寒拾我同儔。玄珠自是無心得。黠慧徒然盡力求。困臥饑殮消歲月。花開葉落認春秋。可憐貪利貪名者。一個狂心百樣憂。

法門無量愧無成。玉兔金烏晷又盈。對境時時消妄念。有身日日厭浮生。山深樹密招提靜。路轉溪回略約橫。像教顛危在今日。更誰來話道中情。

烟霞鎖翠接天濃。疑與人間路不通。寂爾忘言超物外。怡然適性樂某中。祖燈燦燦真堪續。教網重重未易窮。霜狖一聲溪月白。此情非異亦非同。

老我林泉喜陪佳。曾將行李客京華。塵緣此去終無慮。生計年來漸有涯。夾徑長高烏竹筍。滿池開遍白蓮花。日沉歸鳥翻身急。獨倚柴門看落霞。

鳥不銜花事悄然。一輪白日掛青天。戒規末學論持犯。道合中庸絕正偏。凝碧寒泉甜似蜜。揉藍細草軟如氈。下方寒暑多遷變。門外青松知幾年。

褒貶春秋自魯丘。賢才不肖筆端收。人亡金谷貪方息。路極烏江心未休。青塚霜凝千古怨。後庭華落幾多愁。莫來咲我論時事。偶把浮言對俗儔。

不用尋幽遠色聲。遁形何事要馳名。過山明月元無意。出岫浮雲豈有情。覽鏡滿頭霜雪白。看經兩眼眩花生。燒殘楮拙和衣睡。一覺起來天大明。

春暮山深花木香。啣鳴桐角鬧村鄉。晴潭波暖魚遊躍。古樹枝高蔓引長。終日獨看松頂鶴。百年誰悟草頭霜。閒思往古英豪事。總屬人間夢一場。

愛欲沉迷顯異殊。未蠲諸漏總凡夫。四生有想情多惑。萬事無心貴一愚。秦世長城空萬里。漢宮細柳謾千株。時中若欲知三業。舉目頻看地獄圖。

佛祖遺風亦懶追。千差萬別亦忘之。休言已得未為得。不立長期與短期。眾水咸歸東畔海。羣芳先發向陽枝。八紘雲淨天如洗。一句明明舉向誰。

暗室清天了了然。全歸寂滅樂三禪。可憐俗子求長壽。却問仙翁學妙玄。陋巷簞瓢閒境界。畫堂歌管業因緣。一溪流水年年綠。只麼如如傲聖賢。

茫茫三界轉車輪。隨力資持養幻身。數顆芋煨經宿火。一瓶茶煮去年春。深棲禪定蒲龕穩。重寫經題貝葉新。羅什廣翻三藏教。清名高譽藹姚秦。

方便門開悟有由。衣珠未顯可言休。屠龍得角真堪羨。鑽燧逢烟正好求。數片山雲沉晚照。一潭野水泛輕鷗。世間不見蓬萊客。海上空聞有寶洲。

置身高在半雲霄。回首下方人境遙。蓮漏水澄蟾影墮。石樓風細磬聲消。夙緣會遇非今日。往事思量似昨朝。一味埋頭且憨睡。世人嫌我太清寥。

枕石眠雲仰看松。從來佛法自流東。閒情祇把詩消遣。妙道難將理性窮。依約天花飛木末。丁東簷鐸響空中。寄言役役閩浮客。莫用機心輟業風。

著意馳求萬里遙。得來元不隔絲毫。法門廣大含諸有。祖道衰微賴我曹。宗立五家元氣在。航浮一葦浪頭高。參玄未具超宗眼。渾似夜行披錦袍。

一嘯風生拍手歸。谷人相答樂熙怡。細看秋月寒山句。祇有天台拾得知。境入靜時山始好。橋逢斷處路方危。窮通已定宜安分。不見當年薦福碑。

雲林一入不知年。深羨孤標出世賢。雲葉亂堆簷外地。漚華輕弄水中天。柴門長掩緣無客。紙閣重糊為惜烟。短髮任從頭上白。寒溫動靜體安然。

等觀塵世一蘊蘆。名上凌烟不足圖。馬為路遙知力乏。草因霜重見心枯。渴來任掬清泉飲。客至曾無熟炙呼。獨倚柴門發清嘯。躡雲歸與應真俱。

山寒終日懶開門。至理深明不用論。落落明珠還合浦。滔滔逝水絕歸源。破裘重補經三紀。鈍鑿深鋤自一村。偏愛春風無揀擇。堦前依舊長苔痕。

默坐柴床絕所依。眼前物物契真機。莓苔自裏生香樹。松露時沾壞色衣。石罇泉甘茶味足。雲根上淺蕨苗微。雙雙白鷺衝烟去。一曲樵歌送落暉。

松徑逢人懶問名。徘徊無語立溪亭。遇飢只煮山中石。遮眼閒看案上經。翠竹每逢丹鳳宿。碧潭深貯老龍靈。炎涼毀譽時時別。惟有青山今古青。

曠劫靈機挽得回。大千沙界一塵該。手招明月歸茅屋。衲捲寒雲坐石臺。雪點梅腮供冷咲。日烘柳眼帶青開。洞然一片真如境。清淨願深今復來。

曲曲斜斜門外路。東西南北總相通。三重玄要毋勞舉。五位君臣不借功。一徑落花春雨過。滿山啼鳥夕陽紅。何人更問菴中事。憶殺當年個懶融。

石老松枯境寂然。折旋俯仰紀前言。慢幢岌業摧真智。業海煎熬喪本源。當制無鈎狂性象。須防得樹縱情猿。頓空諸有超三際。高揖清風下竹軒。

一天清露冷禪衣。吟斷殘鐘思轉微。百舌忉忉醒客夢。杜鵑怛怛勸人歸。堦前苔蘚高低綠。門外楊花上下飛。滿眼綠陰春又過。是誰格外透玄機。

綿密工夫不計程。森羅萬象伴閒情。下方地傑蛟龍遁。午夜天寬斗柄橫。東土人心多忽忽。西來祖意自明明。藏鋒寶劍光如日。幾度紅爐煉得成。

同迷五濁寔堪悲。濟濟緇流貴寶之。苦行一生堪上傳。清名千古勝刊碑。汲深綆短徒勞力。水到渠成自有時。祖道騰芳在今日。令人樹下憶楊岐。

獲叨斯教足優游。不用歡兮不用愁。對境靜心觀化理。逢人無口問來由。乳麩逐母眠花下。松鼠呼兒上樹頭。懶瓚當年機欠密。天書來往幾時休。

林邊閒想昔時人。巖嶮途中要立身。霸顯功勳慚管晏。縱橫事業耻儀秦。生前和祿隨陽燄。死後聲名等隙塵。四海五湖流浪客。至今知假不知真。

近來四大喜調和。老我無心閒轉多。竹戶經年長自閉。岳僧昨日忽相過。春茶旋種菴前地。秋豆先收隴下坡。任汝功名賤如土。掉頭不買柰吾何。

六戶虛閒夜不扃。孤燈耿耿徹昏冥。宗風未墜思諸祖。詩句重吟憶二靈。鐘斷月樓人已定。猿啼霜樹夢初醒。曉來撥雪尋行徑。自折山梅插瓦瓶。

世道如斯念合忘。世情厭我苦韜藏。自空五蘊離諸病。不把千金換一方。對眾拈花迦葉咲。迷頭認影若多狂。有為總是忙邊事。事到無為總不忙。

結屋高崖轉步慳。翛然四壁夜無關。門前山在春長在。門裏人閒景亦閒。風掠枝頭花片墜。雪消谷口水聲還。終年居此應無愧。大道不離方寸間。

安樂窩中早授方。要知貧富總虛忙。忙中境界須臾過。靜裏光陰分外長。紅日影浮青嶂淡。紫霞光聚紺天涼。山林自可傲朝市。繞屋松蘿滴翠香。

我本田夫今釋子。我師門戶大慈悲。一齋羸守精神爽。雜念不生情性怡。谿柳經霜辭故葉。山花得雨長新枝。會來萬法皆同轍。是聖是凡休遠之。

未悟權分愚與賢。悟時無後亦無先。華池歸去定何日。布衲披來不計年。卜舍自甘隣虎豹。滿朝誰肯棄貂蟬。有時更上磬陀石。極目塵寰一惘然。

門外浮雲任去留。法無定法不須愁。行藏林下有龜鑑。興廢人間等蜃樓。飯罷欠伸閒鼓腹。寒來兀坐只蒙頭。黃金白玉成何事。日不休兮夜不休。

望斷斜陽憶故鄉。淹留塵世十年強。當時不下菩提種。今日豈聞薔蔔香。暗長竹梢高透屋。新栽松樹已過牆。月沉後夜誰相委。數點山螢照草堂。

等觀大地度流年。行亦禪兮坐亦禪。堪愛四山塵絕點。何妨一室靜蕭然。洗盆換水梳堯韭。掃石焚香禮竺仙。彼彼光明看得破。槃中落落寶珠圓。

亭亭修竹護禪關。未許白雲來借閒。岩下古松青不減。天邊飛鳥倦知還。追賢有愧慵歸社。老我無心別買山。今日不圖明日計。火風分散霎時間。

揚鞭舉棹去紛然。不為名牽即利牽。百歲光陰過瞬息。一生心力事他緣。豁然悟鏡頭元在。倏爾昏來鳥落弦。澗草山花渾似錦。是誰來此立峯前。

參罷歸來事宛然。了無一點世情牽。梵音續續終三鼓。清夢頻頻到五天。鐵鉢飯香霜下稻。砂鍋茶煑石根泉。龐眉道者來相訪。學海瀾翻語入玄。

亂山平處夕陽多。抱子黃猿入翠蘿。品字柴頭伴岑寂。一尋拄杖共漚和。喜無俗子喧孤定。時有樵人唱短歌。瞥爾情生機智隔。纖塵瑕類早揩磨。

光明性海渺無涯。尺本無添寸又加。為道了無寒暑變。尋師寧憚路途賒。情迷自用分高下。理在何須辨正邪。堪咲舊時行履別。會來萬法即吾家。

終朝兀坐似癡呆。無倚無依實暢哉。白髮滿頭難再黑。青春過眼易重來。燕辭社去如相約。蜂為花忙似有媒。未盡餘齡隨所住。天真佛不假蓮胎。

雨餘絕頂晚生涼。一種襟懷孰較量。寂寂空山轉青碧。茫茫塵世幾興亡。逢人資舊傷時異。顧影臨風坐夜長。誰證無師無漏智。忽來一陣白蓮香。

茅櫬蕭洒挹溪濱。禪罷搜玄妙入神。流水廣談空諦義。青山頓顯舍那身。烟雲雜沓如排陣。日月流行似轉輪。茅舍入深應有路。不須重問採樵人。

天晴拂曉啟巖扉。粦粦霜華帶葉飛。時至理彰雖有待。功成名遂合知機。張翰豈是思蓴去。陶令休言為菊歸。可止可行人不薦。大都是處却成非。

日出扶桑觸處紅。三千剎海體元同。菴摩羅果無生智。優鉢曇花畢竟空。倒握龜毛酬至化。高提兔角振宗風。一聲啼鳥春光裏。何處是西何處東。

同中有異異中同。六用門頭具變通。頓發辨才瓶瀉水。不留朕迹月行空。定回衣濕蕉花露。吟就詩清竹葉風。入佛入魔俱莫問。太平無象孰論功。

祖師遺韻難輕擬。六十九篇消性情。甘自守愚全素節。從他尚巧耀虛名。久長受用貧邊得。安樂工夫拙處成。此理明明亘今古。黃河知是幾番清。

## 題跋

### 跋高峯和尚書(中有清盞白飯之語)

天目和尚振法道於斯世。其如輝暗之燈與。今觀書帖。初無爾疆我界之語。警訓之辭。凜然在耳。窄菴首座珍藏之久。一日持以示余。需語于後。噫。幸好一分白飯。何必糝以薑椒。

### 簡翁方山和尚書

安洲遇維那持簡翁方山和尚遺墨。求一語于後。噫。二大老只為慈悲故。未免口裏水漉漉地。余又豈可推波助瀾。合掌加額。卷而還之。

### 空中和尚語

山中樵唱。雲頂流毒。謂之有語成謗訕。謂之無語須細讀。石火電光。醍醐毒藥。具眼者辨取。

### 古田和尚答無則和尚語

古人見父師手澤。如侍嚴詔。況酬答叔父書帖乎。焚香拜觀。憫念世間饑苦。一日只作一日計。慈悲深廣。了達夢幻。規訓凜然。成藏主既能珍藏。非惟寶其翰墨。當敬思而奉持。其或言外有聞。則受用又無窮矣。

### 臨終示眾

大凡參學之士。須要信得及行得力。大事未明。如喪考妣。堅持淨戒。一心向道。古人正因出家。正因行脚。為生死事大。無常迅速。廢寢忘飧。如救頭然。奚暇閒情。遊山翫水。奔名逐利。汨沒塵勞。今人口頭雖說參禪。心裏全不肯做。遞相沿襲。與之俱化。瞞人自瞞。大不濟事。如斯等輩。真可憐憫。須是放下世緣。一切處一切時。舉起個話頭。密密參究。今生便要決斷。料想不由別人。但退步就己。用真實工夫。一提提起。一覷覷破。更無絲毫為障為礙。大丈夫一刀兩段。豈肯死於語下乎。且道。者個是死語耶。活語耶。明眼人前。切忌錯舉。

## 遺誡

汝等出家。當行出家之行。當念四恩難報。信施難消。努力以道為重。不可虛度時光。常住十方僧物。為老病故。毋得競爭人我。增長無明。鬪搆是非。戒之慎之。來日煩眾新戒。早為焚化。不須剷頭。不用洗浴。一爐猛火。千足萬足。

## 辭世

現成句子。不妨舉似。虛空撲落。須彌起舞。

## 妙明真覺無見觀和尚住華頂善興禪寺語錄卷下

### No. 1396-D無見觀和尚塔銘(并序)

天台山景德國清禪寺佛真文懿大師曇噩撰

至元大德間。無見觀禪師。以方山寶公之道唱東南。於是天下英雋之儔。高潔之侶。雄豪魁傑之士聞其風而神馳。觀其跡而心服。莫不雜肩脛足。忍饑渴。[日/月]寒暑。形駢影屬。以趨座下。禪師則煦之嫗之。又從而呵怒之。憑之凌之。又從而撫矜之。飛而上則繪繳之。走而下則網罟之。吾惟其得而已。於弋[木\*豕]之勤奚恤。金之鍛也器成。木之斲也材就。宜其棄榮華而甘澹泊。黜聰明而返淳朴。靡然而就弟子之列。莫之牴牾也。禪師諱先觀。字無見。姓葉氏。世為天台仙居顯族。以宋之咸淳乙丑五月六日生。皇之元統甲戌五月二日卒。壽七十。臘五十。即以卒之九日荼毗。而瘞其舍利塔於寺之西偏五十步。嗚呼。禪師其果亡乎。其有不可亡者乎。禪師資性秀穎。幼絕腥醲。嗜讀書。過目成誦。父母素期以儒業起家。會沙門東州善公者。過而識之曰。此法器。宜毋滯鄉里。率敬信善許諾。逮冠從古田屋和尚。薙染於郡之天寧。既具戒俾歸侍司。尤旦夕以此道加策進。禪師即事徧參。見藏室珍公於天封。方山寶公於瑞岩西菴。而往來二公間。雖有所契。未臻其極。遂築室華頂。精苦自勵。一日作務次。渙然發省。平生凝滯。當下冰釋。乃走西菴呈所解。山以偈印之。辭還峯頂。山不能留也。且華頂之勝。自智者顛大寂韶高菴悟諸鉅公。以徽名懿德賁泉石。而天子之尊。王公將相之貴。必詔問法要。躬禮慈容。日馳輶駟。驛致香幣。使者冠蓋旁午。然其地高寒幽僻。人莫能久處。惟禪師一坐四十年。足未嘗輒閱戶限。其拈提開示勘辨之辭。頌偈簡牘之筆。誠般若之餘膏。涅槃之賸馥也。方近騰遠播。雖販夫竈婦之愚。入之耳而出之口。猶將薰其風裁。殮其義味。況虛靈之器。警拔之機。神領意會其妙於文身句身之表乎。故錄而集之。以貽永久。茲不復一二贅舉。其妙明真覺之號。寂光之塔。蓋上所賜也。銘曰。

華頂之峯。嶄絕空碧。下闕滄溟。瀕洞潮汐。如楞伽于海中。佛徇機而遊入。誕闡教乘。曰心曰識。識乃心之資。心乃識之質。三界宛爾而存。萬法樞然而立。心於三界其本。識於萬法其迹。苟本泯而迹亡。肆識空而心寂。達磨西來弗作而述。子孫誦誦虎丘孔碩。茲無見之是承。透金圈而吞栗棘。楞伽之指于焉以塞。達磨之傳于焉

以得。斯華頂於世間獨崢嶸而高出。

### No. 1396-E

會得西菴轉身句。十方世界無躡坐處。四十餘年華頂峯。雖不下山教化眾生。而道行世間。雖不開談玄之口。而話在諸方。門人集此錄。刻舟記劍耳。閱是錄者。謂此是法語小參偈頌。夏蟲不可與語冰。住天台萬年法弟了達題。

### No. 1396-F

佩贖祖無口刀。大坐華頂一峯。戒檢精嚴。機語深穩。有回石頭不下釣魚山風軌。無見之見由是洞然明白。謂余不信。試以此錄驗焉。

元統闕逢闡茂八月上吉。雙徑山主元叟行端跋。

### No. 1396-G無見觀和尚語錄跋

當胡元之末。中華法道尚盛于吳浙間。知識輩出。各踞雄席。交振化聲。時無見觀公高遁天台華頂。四十年影不出山。中峰本公菴居天目。諸方爭請而不應。道風並峻。夙古鮮儔。以故天下指為二甘露門。湖海玄學之士。嚮風趨慕。只恐其後。至我日域求法之侶。莫不航海梯山。願一瞻禮。吁。道德感人乃如是耶。逮乎明季。諸家法脉悉皆斷絕。唯有二翁雲仍繩繩如綫。得非源遠而流長者乎。余嘗憾中峯廣錄梓行已久。獨無見語要未見傳世。殊為缺典。頃檢續藏中。獲睹其錄。正如陰晦長夜忽見夜光之珠。其喜可勝言哉。且其語簡古超邁。足以開發學者。及閱山居諸篇。一皆從真參實踐中渾然流出。固非韻人高士可以擬厥萬一者也。亟宜綉梨以垂將來。倘樂道忘勢頂門具眼者覽之。焉得不重為至寶歟。

峇延寶甲寅歲仲夏月。後學峩山沙門道澄月潭和。

南敬跋。